


3  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
4

古140  
827.1

部-12





來齋金石刻考畧卷中目錄



唐九十五

高祖爲太宗祈疾疏

秦王告少林寺教

太宗晉祠之銘

太宗御書屏風帖

高宗萬年宮碑銘

司徒英貞武公李勣碑

唐故上柱國光祿卿邢國公李公墓誌銘

周順陵碑

景龍觀鐘銘

記泰山銘

孝經

鵲鴿頌

金仙長公主碑

嵩岳會善寺批荅碑

虞公溫彥博碑

尚書右僕射申公高士廉瑩兆記

房梁文昭公元齡碑

中書令高唐公馬周碑

國子祭酒孔憲公穎達碑

芮君豆盧寬碑

太常卿汾陰獻公薛收碑

司徒衛公李靖碑

禮部尚書張後允碑

蘭陵長公主碑

太子少師崔敦禮碑

陽翟侯褚亮碑

大將軍許洛仁碑

大將軍阿史那忠碑

右武衛將軍乙速孤行儼碑

孔廟詔表碑

贈太師孔宣公碑

修孔子廟墓碑

兗公之頌

新修文宣王廟門碑

修文宣王廟記

嵩岳會善寺造像記

少林寺金剛經

天后御製詩

王徵君口授碑

封祀壇碑

中岳體元先生潘尊師碣文

昇仙太子碑

夏日游石淙詩并序

秋日宴石淙序

道安禪師碑

少林寺碑

景賢大師身塔記

嵩陽觀聖德感應頌

少林寺靈運禪師塔銘

嵩岳永泰寺石幢

永泰寺碑

會善寺戒壇敕牒

大證禪師碑銘

梵網經心地戒品

會善寺戒壇記

少林寺廚庫記

狀嵩高靈勝詩

多寶佛塔感應碑

東方朔畫像贊

祭伯父文 祭姪文

華岳題名記

郭家廟碑并陰

臧懷恪碑

宋州八關齋會石幢

茅山碑

麻姑壇記

中興頌

右丞相宋璟碑

孔子廟殘碑

爭座位帖

顏氏家廟碑

魯公與蔡明遠書

奉使蔡州題字

國子學石經

五經文字三卷

新加九經字樣十卷

吏部南曹石幢


崇仁寺石幢

慈恩寺石幢

草堂寺石幢

嵩岳永泰寺石幢

成都府石幢



來齋金石刻考畧卷中



侯官林 侗于野纂輯

上海徐渭仁紫珊甫校



唐

高祖為太宗祈疾疏

此隋大業二年正月八日刻也高祖此時尚為鄭州刺史  
太宗方九歲疏云鄭州刺史李淵為男世民日患先于此  
寺求仙蒙仙恩力其患得損敬造石碑一鋪願此功德資  
益弟子男合家大小福德具興足永無灾障弟子李淵一

心供養石方廣尺許在鄠縣草堂寺非原石乃元寺僧重刻未佳

秦王告少林寺教

行書

今在少林寺中其文刻于裴灌少林碑之上方首曰太尉尚書令陝東道益州道行臺雍州牧左右武侯大將軍使持節涼州總管上柱國秦王世民告柏谷塢少林寺上座寺主以下徒衆及軍民首領士庶等末曰四月三十日按舊唐書太宗紀高祖受禪拜尚書令右武侯大將軍進封秦王加受雍州牧武德元年冬拜太尉陝東道行臺尚書令

尋加左武侯大將軍涼州總管三年加拜益州道行臺尚書令七月總率諸軍攻王世充于東都則此乃四年之四月三十日也其五月丙寅則世充降而河南平矣世民二字草書特大乃太宗親書餘字乃記室參軍所爲今少林寺僧以棒法擅天下在隋之世已能助秦王抗王世充其來舊矣闖獻之亂獨不敢侵犯少林而僧衆專以掠諸賊爲事僧法往往有列大帥建牙者

太宗晉祠之銘

貞觀二十一年御製并書

顧寧人金石文字記祠在太原府西南四十里距今太原



縣八里而今縣則古晉陽之故址唐時爲并州爲北都爲河東河東節度使治昔人立廟于此以祀唐叔考之北齊書已有其名而高祖起兵嘗禱于此冊府元龜太宗貞觀二十年正月幸晉祠樹碑製文親書之于石今存祠中蓋昔之并都甚大祠去城三四里在懸甕之麓晉水之所發源後人于此引池結亭架橋其上林木翳然足爲一方之勝其廟負山而東面者晉水之神南面者唐叔之神後晉天福六年封唐叔爲興安王臺駘爲昌寧公而宋時又封晉水爲顯靈昭濟聖母飾爲婦人之像今之人但言聖母

而不復知有唐叔爲古先有土之君矣水經注云昔智伯遏晉水以灌晉陽後人踵其遺蹟畜以爲沼沼西際山枕水有唐叔虞祠水側有涼堂結飛梁于水上北史薛孝通曾與諸人同詣晉祠皆屈膝盡禮孝通獨捧手不拜顧而言曰此乃諸侯之國去吾何遠恭而無禮將爲神笑是則當時之所祀者唐叔非水神也祠前蓮花臺上有鐵人四一紹聖四年一五年造俱完一宏治十一年一無年月俱壞今之工不及古也 碑陰上方書從官七人曰司徒太子太師上柱國趙國公臣無忌司徒太子太師上柱國宋

國公臣瑀特進太子詹事兼左衛率上柱國英國公臣勣  
光祿大夫刑部尙書上柱國鄖國公臣張亮禮部尙書上  
柱國江夏郡王臣道宗太常卿駙馬都尉上柱國安德郡  
公臣楊師道正議大夫守中書令太子左庶子兼攝吏部  
尙書護軍臣馬周凡七行字體不一皆當日七公自書者  
觀高宗萬年宮碑陰同一例也下方空處皆唐以後人續  
題絕無唐人書以本朝御碑臣子不敢擅題也余此碑得  
之舊書肆而缺碑陰祥符周雪客許補贈碑陰及余至江  
寧而周適粵余歸而周死矣天末片紙難以復得命家弟

與人錄此七行于冊末按唐書新羅王真德遣其弟入朝  
其歸也太宗令公卿宴餞賜以御製溫湯晉祠銘二碑并  
新撰晉書新羅至今猶寶藏也而溫湯之石今亦亡矣

唐太宗御書屏風銘

貞觀十四年四月二十二日

在餘杭縣官廨丙午春在燕京于報國寺集場見唐太宗  
屏風銘帖索重價不能得庚戌初夏與友人陳成之士芳  
夜坐齋中論太宗以神武定天下而六書八法精妙乃爾  
非天縱安能若此因憶屏風帖殊覺悵然成之謂鄉學究  
巾笥中有此紙不知貴重因以他冊易之對坐補綴手自

裝潢迄今不覺三十年里人有爲餘杭令者知此石在解  
中因首行石缺名爲截角碑連得二紙歐陽公云物聚于  
所好非耶若太宗所書文德皇后碑魏鄭公碑與溫泉宮  
碑皆亡久矣則此帖其可不貴重乎

高宗萬年宮碑銘

永徽五年五月

高宗御製御書石高四尺廣二尺二寸計二十二行每行  
四十一字碑今在麟遊縣九成宮中萬年卽九成之更名  
也高宗書法不愧乃父大約皆精入于 而閭劣受制  
武氏可 也碑陰刻奉敕中書門下見從文武三品以上

并學士并聽自書官名于碑陰後列從官長孫無忌李勣  
褚遂良五十餘人字體大小不均如賀蘭契苾諸蕃將當  
非親書如大將軍張貴生硬之中卻有拔劍橫矛之意亦  
一奇觀

司空英貞武公李勣碑

高宗御製御書咸亨元年

在醴泉縣昭陵漢之興也項羽爲之先驅唐之興也李密  
實首發難雖羽咤叱風生非司馬子長之筆則拔山蓋世  
亦無由而傳密非羽比然亦一世之雄信布楚將卒爲漢  
臣英公鄭公始事密而終爲唐之良佐信有天焉未可以

成敗論也世勣統數十州之地歸唐而不居功密以叛誅而表請收葬不負事人之節可謂難矣碑中所謂密來投附公獨未歸既承其旨方奉皇運誠于所事造次必形者是也勣與鄭公皆爲唐佐命臣勣幸而豐碑存後人因以識其冢屹若連山之狀鄭公不幸豐碑一仆于文皇再墜于後之豎子後人不知但稱爲丞相冢云余入潼關渡涇渭謁昭陵徘徊陪葬諸功臣邱隴間碑碣百存其二三鄭公碑已爲泰山之無字且卧于地矣英公碑製巍然而廢滅者過半不勝懷古之想及至澶淵因古來戰爭之場英雄之所驅馳也壁壘猶存西眺鉅鹿想天地之震動咫尺黎陽憶厥庾之貯積過大伾繙濬縣志讀之而得鄭公所爲密墓志銘深歎其不終澶淵夜雪鑑析聲寒 項羽本紀一再讀之風耶雨耶車馬劒戟之聲耶草昧英雄成就如此不自知其欲歌而欲泣也陪陵碑此最高大豈非陛下冢事一言而爲是以報之耶乃敬業之叛武后既發公冢而暴其屍此碑獨不毀何歟冢象鐵山陰山烏德韃山之狀土人謂下三冢

李衛公墓居北謂上三冢相去里許

碑高二丈餘廣五

尺三十二行每行存上半四五十字可觀餘字以摹印之

爲鄉人捶損過半矣密墓在濬縣大伾山西南五里高七  
仞明初牧人入冢取石而出明末爲鄉人燔作石灰可惜  
守土與士大夫均有責也丙午秋日跋于澶淵披雲樓并  
錄密墓誌備考焉

唐故上柱國光祿卿邢國公李公墓誌銘

太子洗馬

魏徵撰

觀夫天造草昧之初有聖經綸之始原鹿逐而猶走瞻  
鳥飛而未定必有異人間出命世挺生負問鼎之雄圖  
鬱拔山之壯氣控御英傑鞭撻區宇志逸風颺勢傾海

岳或一丸請封函谷或八干以割鴻溝夏股資以興亡  
楚漢由其輕重懋功隳于將立長策敗于垂成仰龍門  
以摧鱗望天池而墜翼求之前載豈代有其人者哉公  
諱密字元邃隴西成紀人自種德降祉宏道垂風導碧  
海之長瀾竦闡風之遙構家傳餘慶明哲繼軌論文德  
則弼諧舜禹語武功則經綸秦漢其餘令望且公且侯  
垂翠綉施鳴玉者蓋亦耆舊未得盡傳良史莫能詳載  
矣曾祖弼周太師上柱國衡公祖曜周太保魏公父寬  
隋上柱國大將軍涼州總管蒲山郡公匡周之美呂望

魏其嘉謀平吳之功杜預慙其遠畧公渥注龍種丹穴  
鳳雛降列象之元精稟成形之秀氣雲生五色一日千  
里起家左親衛府東宮千牛備身趨馳武帳輝映廊廡  
出入龍樓光生道路隋文帝精華已竭義不斷恩始開  
陵長之源將致覆宗之禍公見機而作謝病言歸優游  
經史晦明藏用風塵靡雜賓友簡通交必一時之俊談  
必霸王之畧尙書令景武公楊素崖岸峻峙天資宏亮  
壁立千仞直上萬尋嗣關西之孔子追陝東之姬旦深  
謀遠鑑獨步當時公年甫弱冠時人未許景武公一見

風神稱其傑出乃命諸子從而友焉結以始終之期申  
以死生之分暨有隋二世肆虐黔首三象霧塞五岳塵  
飛妖災所臻匪惟血落星隕怨讟所動寧止鬼哭石言  
轍迹遍於天下徭戍窮於海外冤魂塞宇宙白骨蔽原  
野墳壟發掘城郭邱墟萬里蕭條人烟斷絕公與楚公  
協契共拯橫流未息溟海之波幾及崑岡之火亡自道  
中竄身草澤奮臂大呼羣雄嚮起豹變梁楚鳳翔鞏洛  
據殿庑而塞轅轅登太行而臨白馬九服諸侯四方豪  
傑或跨州連郡或稱帝圖王合從締交爭亡秦族者莫

不驅茲青犢背彼黑山擊長轂以雷奔望高旗而電集  
不期而會者以百千數遂大開幕府肇啟霸圖敷七德  
以宣威掩八紘而取俊鱗羽畢萃草澤無遺于是發人  
文以化之播仁義以乘之應時機以鼓之總羣策以決  
之九野風馳六合雷駭彈壓趙燕振驚江漢世充甚昆  
陽之敗煬帝同望夷之禍化及師殲於黎陽建德稽顙  
于河朔七國之地四爲我有五都之所三在域中胡騎  
千羣長戟百萬飲馬則河洛可竭作氣則嵩華自飛近  
無不懷遠無不樂喜溢寰宇威懾華夷屬人神之乏主

以天下爲己任荒裔佇來蘇之望遺黎有息肩之思雖  
實下民伊賴然非上帝所臨壯志展于人謀雄圖屈於  
天命始先鳴于大樹終垂翅于羣孽乃眷西顧舉茲東  
夏載驅周道來謁承明帝曰念功降茲休命上柱國邢  
國公拜光祿卿公威雖未震主自爲謀蓋當世舊部先  
附多出其右故吏復來或居其上懷漁陽之憤憤恥同  
吳耿後列同淮陰之怏怏羞與絳灌爲伍負其智勇頗  
不自安俄屬元帥秦王經營灑洛公亦親承祕策率兵  
先行旣出雞鳴之關方次休牛之塞詔令施號更盡嘉

謀公想雲夢之僞遊慮青衣之詐反心辭魏闕之下志  
在江湖之上慕范蠡之高蹈追赤松之遠遊熊耳峯危  
羊腸路險降吳不可歸蜀無路短兵旣接修途已窮陰  
陵失道詎展拔山之力騅馬不逝徒切虞兮之歌臨陣  
喪元時年三十有七故吏止柱國黎陽總管曹國公徐  
世勣等表請收葬有詔許焉公體質貞明機神警悟五  
行一覽半面十年雅善書劍尤精文史輕一夫之勇學  
萬人之敵至于三令五申之法七縱七擒之功出天入  
地之奇拔幟擁沙之策莫不動如神化應變無窮負縱

橫之才遇風雲之會望紫氣以驥首凌扶搖而振翮總  
不召之衆問獨夫之罪從我如流三分將二遂有囊括  
四海之志併吞六合之心旣而神器有歸朝宗天闕率  
從義之旅爲勤王之師更以名重自疑功高是懼將遠  
遊以避難翻窮途而及禍惜乎高鳥未盡良弓遽折敵  
國猶梗謀臣已喪天子過細柳而興嗟聞鼓鼙而軫慮  
雅重事人之節方申詔葬之禮粵以武德二年某月日  
葬于黎陽山之西五里之平原禮也故吏徐世勣等咸  
同嬰世網共涉艱難感意氣于一言託風雲於千載所



恨並發唐代不列元凱之功俱爲漢臣獨漏山河之誓  
是以慟深欒布悲甚向雄慮陵谷之推移勒斯銘于泉  
戶庶使神遊楚國無慚項羽之臣魂往齊都不愧田橫  
之冢乃爲銘曰 如馬唐臣猶龍周史宏道百世邁德  
千祀帶地深源極天峻峙玉種逾潤蘭芽不已成形騰  
氣成象降精餘慶鍾美惟公挺生少表奇智早擅英聲  
符采發越志畧縱橫隋道方衰始開陵長覩茲兆亂緬  
然長想閉關晦迹招弓莫往盤桓利居不嬰世網運否  
道消時逢改卜朱旗爰止素靈已哭野戰羣龍馳走原

鹿競窺周鼎爭亡秦族時遭護屈運偶鳳翔劬勞百戰  
經營四方振蕩六合牢籠八荒始聞楚霸終基漢皇羣  
雄並起莫恢王度聖人旣作皇天乃顧爰茲東夏言遵  
西路來擬竇融寵逾英布爵窮五等位登九棘帷幄參  
謀高衢騁力海運方遙圖南未極縱壑摧鱗摩天墜翼  
熊耳失路新安隕身長男喪楚少女留秦驚魂靡託反  
葬何因列樹松檟惟餘故人

周順陵碑

武后父士彘墓

睿宗御書

在咸陽縣北原陵前佛寺內藏石一片如几厚二尺許存

百許字武三思譔相王旦書趙子函云碑用武氏製字武  
三思稱愚猶可而且亦曰愚當發一笑書不知真出旦否  
方整道健可錄也碑已仆于乙丑之地震而亡于縣令之  
修河余猶從故家見其搨本 乙巳四月余至咸陽過順  
陵見陵製壯麗幾與昭乾二陵埒南雙闕內天祿辟邪二  
石獸東西相向高丈許又北翁仲十又北石獅二南向尤  
高大又北爲陵廟舊址今爲佛寺三層碑石一片在中楹  
可坐可卧百許字徑可二寸寺後石獸翁仲如前之數又  
北巍然陵也武氏爲李家婦竟以女子稱制革命追尊父

母此天地一大變局令人短氣非狄梁公唐祚不幾殞乎

景龍觀鍾銘

睿宗御製御書

景雲二年九月

今在西安府鍾樓上 景龍觀中宗所作睿宗時鑄鍾製

銘觀久毀鐘移西安城鍾樓上在臬署西偏聲聞數里爲  
有唐故物但摹印甚難白日登樓下窺官署鍾錚然有聲  
匠人印者以草塞其內種包其外而後得之銘廣二尺縱  
少減金石文字記曰初唐人作字尙有八分遺意正書之  
中往往雜出篆體無論歐虞諸子卽睿宗書亦如此猶之  
初唐律詩稍似古風平仄不盡穩順開元以後書法日盛

而古意遂亡遂以篆楷爲必不相通分爲兩部

紀泰山銘

元宗御製書

開元十四年

唐太宗時羣臣請封禪不許曰卿等以封禪爲帝王盛事朕意不然誠令天下又安家給人足不封禪何損今天下殫敝人物凋耗卽封禪愈靡靡矣昔秦始皇封禪而漢文帝不封禪後世豈以漢文帝不及始皇耶且古者事天掃地而祭天神降焉何必登太山之巔封數尺之土然後展其誠敬乎已而羣臣請不已許之魏鄭公獨爭以爲未可帝曰公不欲朕封禪以功未高耶曰高矣德未厚耶曰厚矣以中國未安四境未服年穀未豐天瑞符應未至耶對曰陛下兼此而有之矣然則卿斷斷云不可封禪何也對曰陛下雖有此六者然百姓當大亂之後戶口未復倉廩尙虛呻吟未起而東巡卽供億煩費其未易任也且陛下封禪萬國君長皆當扈蹕今伊洛以東至于海岱灌莽極目此爲引戎人入腹中而示之以空虛况賞賚不豐則不能厭其望必豐之雖給復連年固不償百姓勞矣崇虛名而受實害將焉用之帝大感悟事竟寢鄭公匡救愷切當上心如此開元帝致治庶幾貞觀不免侈心漸生姚崇旣

死宋璟罷相張說處中書文章信美矣骨鯁安敢望鄭公  
未幾林甫國忠進而天下幾亡讀唐史至開元天寶之際  
恫乎有餘憾焉 開元帝十四年東封帝作紀泰山銘大  
書深刻于穹巖之上王元美曰余登泰山轉天門則見東  
二里許穹崖造天銘書若鸞鳳翔翥于雲烟之表爲之色  
飛旣摩挲久之惜其下三尺許爲搨工惡寒篝火焚蝕遂  
闕百餘字傍有蘇丞相頌東封頌正書閩人林焯鑿忠孝  
廉節四大字于上惡札題名縱橫漶滅不可讀悵然而下  
後人事事可憎殆不特此余得一紙于泰安州守家果菴  
廣三丈高六丈字徑可六寸真足與泰山齊觀矣

孝經

天寶四載隸書

元宗御製孝經頌并注皇太子亨篆額今在西安府學墨  
洞內作大亭以覆之下作石臺高五尺餘琢鬼工猗猗擎  
扶狀上琢石葢爲龍螭擎攫狀皆極精緻中石四面皆廣  
五尺高九尺餘束以巨鐵上下通計高二丈四面遍書每  
面二十四行每行二十一字小注分寫兩行石瑩潤如玉  
照人鬚眉朗若明鏡鑿刻精工爲最殊觀書法與泰山銘  
同老勁豐妍如泉吐鳳如海吞鯨非虛語也後有李齊古

所進石臺表行書亦佳同勒諸臣名字皆秀勁可愛至如  
行押數行尤豪爽飛動王元美謂帝是時爲林甫蠱媚極  
矣猶知有是經耶三子同日就隕屬饑南內淒涼廢食厭  
代唐家父子如此循覽遺跡爲之慚慨

鵲鵠頌

元宗御製御書

開元帝篤友于之愛爲長枕大被此亦帝王之盛事不可  
以妃子之亂而忽之開元中鵲鵠數千翔集麟德殿前右  
衛率府長史魏光乘作頌帝俯而和之十一章詞旣稱美  
字更道逸見於戲鴻快雪諸帖中可貴也 歐陽集古錄

曰當皇祐至和之間余在廣陵有敕使黃元吉者以唐明  
皇自書鵲鵠頌本示余把玩久之後二十年獲此石本于  
國子博士楊褒又三年來守青州始知刻石在故相沂公  
宅然則此頌宋時已勒石矣

金仙長公主碑

在蒲城縣金粟山睿宗橋陵內 明皇行草中有開元字  
面漫漶存二三百字亦在隱見間矯逸異常大都書法至  
開元帝一變文爲徐嶠之作有先帝不奪雅志云云嶠之  
亦以書名其子浩又世其學不獨稱率更蘭臺父子已也

嵩岳會善寺批荅碑

代宗大歷二年十月丙敕于會善寺建戒壇抽律生七人講律者主僧乘如表謝代宗批荅云戒分律儀釋門宏範用申獎導俾廣勝因允在嚴持煩于申謝二十四字書法不及乃祖亦自佳以見唐帝能書者多皆太宗有以啟之也 石在會善寺內一碑列三層上層大歷二年敕牒中刻乘如謝表下刻批荅

上諸帝御書十四種而則天后昇仙太子碑亦為御製御書不以列于諸帝者惡其瀆也仍歸于嵩山諸碑內

虞公温彦博碑

岑文本撰歐陽詢正書貞觀十一年十月

碑以貞觀十一年十月立已殘缺計三十六行祇存上截

三百餘字

按唐書恭公以貞觀十年薨年六十四而歐

陽信本年八十餘矣而字猶精健乃爾顏魯公家廟碑文

史稱温大雅與思魯

顏魯公高祖

同事東宮彦博與愍楚同直

內史省彦將與遊秦同典校祕閣二家兄弟各為一時人

物之選少時學業顏氏為優其後職位温氏為盛其為通

賢所稱若此

尚書右僕射申公高士廉瑩兆記

在昭陵許敬宗撰趙模正書以貞觀二十一年薨壽七十  
二石殘缺存百餘字不知葬年月日碑側云會昌四年五  
月四日六代孫尙書左丞元裕拜塋所一云六代孫正議  
大夫行給事中上柱國渤海縣開國男食邑三百戶賜紫  
金魚袋少逸謹附名題于碑側會昌四年五月十五日

房梁文昭公元齡碑

在昭陵褚遂良書舊唐書公諱喬字元齡碑曰諱元齡字  
喬新唐書從碑以貞觀二十二年薨年七十計三十四行  
止存上截尺許每行有二十餘字可觀文不知誰撰

中書令高唐公馬周碑

隸書

在昭陵許敬宗撰殷仲容分書貞觀二十二年薨碑殘缺  
存三百許字有永徽二年贈尙書左僕射詔

國子祭酒孔憲公穎達碑

于志寧撰正書貞觀二十二年

在昭陵碑殘缺趙子函謂公有功六經鬼神呵護故碑多  
可讀今殊不然計三十四行上二尺許寥寥數字可觀規  
摹虞褚法史云字仲達碑云字冲遠當從碑貞觀二十二  
年六月十八日薨年七十五隱隱見于碑者

芮君豆盧寬碑

在昭陵永徽元年卒據金石錄李義甫譔不知誰書豆盧代北著姓魏太和中稱單姓爲盧寬乃隋文帝之外孫爲梁泉令高祖定關中與刺史蕭瑀同赴京師累授殿中監子懷讓尙萬春公主貞觀中歷禮部尙書左衛大將軍封芮國公

太常寺卿汾陰獻公薛收碑

在昭陵殘缺存百餘字據金石錄于志寧譔不知誰書武德七年薨最早年三十三碑額唐故太常卿上柱國汾陰獻公薛府君之碑

司徒衛公李靖碑

正書

在昭陵許敬宗譔王知敬書 顯慶三年準衛霍故事爲陰山鐵山烏德鞬山狀土人謂之上三豕王知敬與虞褚諸公入內府臨蘭亭者昭陵碑多殘缺此獨有千餘字可讀 金石文字記曰其文有曰憫茲視突突卽肉字謂蚩愚之人也史記李斯傳禽鹿視肉索隱曰禽鹿猶禽獸也言禽獸但知視肉而食之莊子及蘇子曰人而不學譬之視肉而食文子言人有二十五等其二十四等謂之肉人廣韻肉俗作宐字乃俗書也而今人以爲古字誤矣宋元



祐四年二月游師雄別立碣于唐碑側刻云唐特進衛國公李靖以貞觀二十二年薨年七十九贈司徒并州都督陪葬昭陵墳制如衛霍故事起冢象鐵山積石山以旌殊功今按其墳在昭陵左北距山麓三里南距今醴泉縣三十五里冢爲三山之狀主山與西山迤邐相屬而東北者勢若斷絕別爲一山疑其一象積石而一象鐵山也而其高五十五尺東西七十五尺周一百五十五步遺跡雄偉見之者無不想其英概能以功名始終真一代之名臣也前有神道碑乃許敬宗撰王知敬書其座元無鼇制規模皆削于英公未詳其然也訪古者可以觀焉

禮部尙書張允碑

在昭陵殘缺不知撰書顯慶三年額題大唐故禮部尙書張府君之碑 太宗受學于張允文皇卽位尙在下僚乃自請老文皇始悟置酒宴之尋以對孔門弟子稱旨授國子祭酒卒加禮部尙書陪葬昭陵

蘭陵長公主碑 正書

在昭陵碑殘缺據金石錄李義府撰不知誰書首云太宗第十九女也顯慶四年薨年三十二

太子少師崔敦禮碑 正書

在昭陵據金石錄爲于志寧撰殘缺不知誰書顯慶間卒碑額題太子故少師中書令固安昭公崔公碑

陽翟侯褚亮碑 八分書

在昭陵殘缺存五百餘字不知撰書姓氏以貞觀二十二年薨壽八十八碑額題大唐褚卿之碑文內有龍朔暨封陽翟侯數字可見

大將軍許洛仁碑

在昭陵殘缺不知撰書人隱隱可見者破宋老生有功年

八十五諡曰勇

大將軍阿史那忠碑 正書

在昭陵殘缺不知其卒葬年月撰書姓氏額書大唐故右驍衛大將軍薛國貞公阿史那府君之碑

右武衛將軍乙速孤行儼碑 分書

在昭陵北五十里叱干村東與其父左領軍將軍神慶墓相去十餘步劉憲撰白義暉分書此碑去昭陵最遠

林同人曰趙子函以萬歷戊午遊昭陵家本秦又得賢主人極搜討之樂顧瞻低徊穹碑豐碣仆者起之埋者出之

百六十殘篇斷簡猶二十餘種至崇禎丁丑方二十年苟  
公好善修醴泉縣志所載昭陵碑目悉同趙子函所見又  
二十八年爲康熙甲辰余過昭陵經鼎革之後耳目非舊  
而余乃倩工搜搨僅得英衛房馬諸公十六碑字之存者  
已不能如趙公所云耳若段志元唐儉姜遐阿史那監門  
王公及蘭陵公主別碑皆亡矣又三十年予重遊西涼過  
關中時秦方大饑百里斷人烟昭陵一徑化爲萑苻之藪  
行旅裹足竊憶前所存十六碑將復沈沒于寒烟衰草中  
後人不得而見也每翻閱碑本愈加珍重作爲昭陵石蹟

考畧三卷慨雄風之不作傷帝制之將湮不禁寄愁天上  
云爾

### 孔廟詔表碑

在曲阜縣廟中武德九年十二月詔一通太子卽位之初  
年也高宗乾封元年詔一通太子宏表一通乾封元年祭  
文一通共爲一碑隸書出一手王元美曰其行筆不甚精  
工而時有漢意乃知古法自開元帝始盡變也金明昌二  
年七月一日暴風折木壓其碑仆于地龜趺分爲二碑與  
字俱無害豈陰有所相而然耶九月一日復命工易以此

座云

開州刺史高得裔記

贈太師孔宣公碑

隸書

在曲阜縣孔廟崔行功撰孫師範分書乾封元年立金石文字記曰碑文內升升二字升音陞升音蚪隸釋漢苦縣老子銘有升星字司隸校尉楊孟文石門頌上順升極白石神君碑米升五錢注並去斗字漢隸分韻升升二字上升下斗唐比邱尼法琬碑天分斗極竟作升字則謬矣昔人以其文易混故改升為斗俗作斗而二字多有誤者故漢書食貨志治田勤謹則畝益三升不勤則損亦如之臣瓚曰當言三斗

尚書帝命驗黃曰神斗博雅誤作神升又世語姜維膽大如升誤作斗

修孔子廟墓碑

在曲阜縣廟中開元七年李邕撰張廷珪書邕文不及書此碑是已廷珪有書名書小史謂邕文必請廷珪書而論者有古木隕沙閒花映竹語觀此亦未為的然且書趙盾作趙遁何也

兗公之頌 正書

舊唐書禮儀志開元二十八年八月制追諡孔子為文宣

王贈顏淵爲宥公閔子騫費侯冉伯牛鄆侯冉仲弓薛侯冉子有徐侯仲子路衛侯宰子我齊侯端木子貢黎侯言子游吳侯卜子夏魏侯又贈曾參顓孫師等六十七人皆爲伯

新修文宣王廟門碑

在曲阜孔廟裴孝智撰裴平書大歷八年十二月

修文宣王廟記

在曲阜縣賈防撰無書者名咸通十一年三月 孔子三十九世孫溫裕以私俸奉請葺廟蒙獎中書門下牒一道

曲阜孔廟碑石林立自漢至隋凡十一碑已編于前唐碑凡六通序次如右自宋而下不詳錄焉

嵩岳會善寺造像記

八分書麟德元年十月

今存本寺大殿右

少林寺金剛經

正書

王知敬書咸亨三年是時元奘奉敕再于東都譯諸佛經佛法方盛之始天子尙加敬信書此經所由來矣第石質似惡刻亦未精剝蝕甚存不及半正可與李靖墓碑參看嵩岳諸碑自漢開母廟石闕至唐狀嵩高詩碑凡二十

七種俱楚黃葉井叔所貽

天后御製詩

正書

在少林寺王知敬書永淳二年九月 武后既殺王皇后

宮中時有崇故常居東都嵩山諸勝多所游觀而三十六

峯碑碣亦惟此時爲盛

王徵君口授碑

正書

在嵩山老君洞南垂拱二年四月徵君卽王元宗也弟紹

宗甄錄并書

封祀壇碑

在登封縣西萬羊岡武三思譔天冊萬歲二年薛曜正書

下截剝蝕

中岳體元先生潘尊師碣文

在老君洞王適譔司馬承禎分書聖歷二年

昇仙太子碑

在偃師縣南三十五里武后御製并書聖歷二年六月王  
元美謂文似北門諸學士手筆意軟媚無鐵椎椎悍馬時  
意氣且旣爲太子立碑而以蓮花六郎稱其後身得不穢  
千古青簡耶趙子函云碑首昇仙太子之碑六大字飛白

書作鳥形亦佳飛白書久不傳于世此其僅存者耳葉并  
叔先生以此碑寄余未有額爲之一悵乃行書甚虬健有  
致非直柔也

夏日游石淙詩并序

凡六十八人

在嵩山石淙北崖上薛曜正書久視元年五月 天后自  
製七言一首侍游應制皇太子惠顯太子左奉裕率兼檢  
校安北大都護相王惠旦太子賓客上柱國梁王惠三思  
內史惠狄仁傑奉宸令惠張易之麟臺監中山縣開國男  
惠張昌宗鸞臺侍郎惠李嶠鳳閣侍郎惠蘇味道夏官侍

郎惠姚元崇給事中惠閻朝隱鳳閣舍人惠崔融奉宸大  
夫汾陰縣開國男惠薛曜守給事中惠徐彥伯玉鈐衛郎  
將左奉宸內供奉惠楊敬述司封員外惠于季子通事舍  
丞惠沈佺期各七言一首

秋日宴石淙序

在嵩山石淙南崖張易之撰正書闕年月疑與夏日同時  
之事

道安禪師碑

在嵩山廢戒壇寺西南宋儋撰并行書開元十五年十月

宋儋開元中人明甚淳化閣帖編入隋朝王著之不學  
乃爾

### 少林寺碑

在寺內鐘樓下裴濯撰并書行體開元十六年七月裴懿  
公負文筆號霹靂手不以書名而此文不及書法秀勁漸  
升伯施之堂此碑上方刻秦王告少林寺教元宗書太宗  
文皇帝御書七大字其陰刻開元賜田牒一碑前後三刻  
景賢大師身塔記

在嵩山會善寺羊俞撰沙門溫古行書開元二十五年八

月 葉井叔云按王維有留別溫古上人詩云宗兄此削  
髮蓋其族人亦必可稱也

### 嵩陽觀聖德感應頌

在登封縣故嵩陽觀遺址李林甫上徐浩分書裴迴題額  
天寶三載石高一丈廣五尺八寸計二十五行每行五十  
字碑高大爲諸碑冠宋廣平碑方豪記云高二丈許然石  
身不過八尺廣僅五尺若此碑下龜上螭不知如何壯麗  
惜乎其爲林甫所上與道士孫大沖煉丹九轉諛飾方術  
以邪事主不足稱也



少林寺靈運禪師塔銘

崔琪撰沙門勤行書  
天寶九載四月

今在寺中碑頂有字云寺西石塔靈運師墳卽梁皇帝嗣

者也以其爲梁武帝之裔而稱皇嗣亦爲不順其陰刻陀

羅尼經咒

嵩岳永泰寺尊勝咒石幢

在寺內庭西天寶九載

永泰寺碑

沙門靖彰撰荀望行書  
天寶十一載閏三月

今在嵩山永泰寺

會善寺戒壇敕牒

行書大歷二年十一月

今在嵩山會善寺西上層刻中書奉敕牒中層刻沙門乘

如謝表下層刻代宗御書批荅二十四字

大證禪師碑銘

王緝撰徐浩正書

大歷四年

今在嵩岳寺

梵網經心地戒品等

高堅正書

大歷十三年正月

今在嵩山會善寺後一碑兩面

會善寺戒壇記

陸長源撰陸郢分書并篆額貞元十一年七月

少林寺廚庫記

顧少連撰崔旼正書貞元二十年

狀嵩高靈勝詩

尉遲汾撰正書無名  
大和三年六月

今在中岳廟壁有宋熙寧丁巳王紳題云府尹王侍郎准制拜嶽準字作淮

多寶佛塔感應碑

在西安郡庠岑勛撰顏真卿正書天寶十一載 趙子函云魯公此書最著以其字比諸碑稍小便于展玩耳而結法視東方讚家廟碑似少遜 王元美曰貴在藏鋒小遠大雅不無左史之恨信然碑舊在興平千福寺不知何時

移立西安府學中岑參有登千福寺楚金禪師法華院詩  
東方朔畫像贊

在山東陵縣夏侯湛撰顏真卿正書天寶十三載 子少時鄉人有爲陵令者以此碑一紙餉旅館主人予見悅之及長問其家亡有也後自秦抵開州去陵邑四五百里其令秦人以世好求之得四紙歸闕偶置別舟下建溪觸石舟破碑紙損裂愧趙子固之護蘭亭猶補綴得一本裝潢頗精護以佳木又爲人竊去悵惘久之後于故家得舊搨本後又得畫贊而缺碑陰亦可無憾記此以見守藏之不

易子孫其識之右軍作畫贊小楷風流蘊藉爲百代模式  
魯公乃大書深刻巖巖氣象有垂紳搢笏之容皆東方生  
之所顧盼而深喜也

祭伯父豪州刺史文 祭姪贊善大夫季明文

二文俱乾元元年魯公文稿也石本有單行者有見于各  
法帖中者

華嶽題名記

在岳廟精享碑東側顏真卿正書乾元元年十月 魯公

自蒲州刺史除饒州與監察御史王廷昌穆寧評事張澹

華陰令劉曷主簿鄭鎮同謁廟題記字徑二寸僅百餘字

郭汾陽王家廟碑并陰

在秦藩司內御題額顏真卿撰并正書廣德二年十一月

汾陽忠武王子儀爲父太保敬之作家廟立碑魯公爲  
文并書當矣相傳今秦藩司乃當年汾陽府第故其立碑  
地今爲下庫雖有亭覆之輿皂居處豈知愛護故石微漫  
漶卽承宣者亦未必知所重也予嘗一至亭前不知牝犬  
生子其下狂吠而出羣犬隨之幾至狼狽疾奔得免好事  
之報每思及輒發一笑碑面書文及銘碑陰行筆列汾陽

崇正文予家藏  
有宋拓精本

兄弟子姪官爵俱列大位太保九男長子琇次子儀三子  
雲四子瑛五子珪六幼賢七幼儒八幼明九幼冲史止載  
汾陽弟幼明一人而子儀官封史與碑亦多不合錄之以  
備考下錄汾陽歷官如碑陰茲不贅太保孫見于碑者十三人曜盱晞咄  
晤昉曖覲曉曙昫映暄皆有官爵曜晞二人俱稱太原縣  
開國公會孫見碑者二人刻名處爲人所壞一曰守少府  
卿一曰守國子監主簿子從郭氏寵命錄鈔當日碑有  
所未載者世次于後汾陽有大勲于唐室宜其後之以熾  
而昌也盱子儀次子晞子儀三子兵部尙書封趙國公曖

子儀六子卒贈尙書左僕射以女爲憲宗后穆宗太后復  
贈太尉曙子儀七子先金吾大將軍卒封沂國公听子儀  
姪幼明之子安西大都護四鎮節度使文子儀姪郭太后  
叔父封鄭國公曜太子太傅諡曰孝郭太后穆宗母憲宗  
后也爲曖尙代宗長女昇平長公主之女追贈曾祖太保  
追封岐國公敬之贈太傅父曖爲太尉母虢國長公主爲  
高國大長公主釗曖之子工部尙書劍南西川節度入爲  
太常卿檢校司徒郭太后兄也鏐金吾大將軍卒贈尙書  
左僕射尙順宗長女漢陽公主張太子詹事仲恭尙穆宗

第四女金堂公主銀青光祿大夫仲詞尚穆宗第六女饒

陽公主釗之第三子也銀青光祿大夫襲封太原郡公仲

文殿中少監以上抄忠武王陪葬肅宗之建陵陵內陪葬

在武將山與太宗九嶼山昭陵相連而稍西北何以無墓

碑或經後人埋沒未可知也郭氏子孫今尚盛住居華下

華州之東路旁有郭汾陽故里石碑此地山川亦極秀麗

集古錄有忠武王將左畧碑云貞元十二年陳翊譔翊之

所書亦為盛矣猶言得其六七蓋其官至宰相者七人為

節度者二十八人尚書丞郎京尹者十人為察使者五人

據翊所得而書者實六十人而顯名于世者蓋五十人雖

喬琳周智光李懷光僕固懷恩等陷于禍敗然杜鴻漸黃

裳李光弼光進之徒偉然名見于當時而垂稱于後世者

亦為不少豈惟得失相當而已哉雖汾陽功業士多喜附

以成名然其亦自有以得之也其忠信之原固出其天性

至于處富貴保名德古人之所難者謀謨之際宜亦得其

助也

贈工部尚書臧懷恪碑

在三原縣北原李秀巖篆額顏真卿撰并正書廣德二年

魯公此碑書比諸石風骨特秀勁下截爲田夫摩礪無字上半精采奪目可寶也 按碑公諱懷恪東莞人今之沂州非粵之東莞魯公與臧氏交厚碑云臧氏自驃騎以還世以材雄朔陲迫于今茲蕃衍彌熾自天寶距開元乘朱輪而拖珪組者相望國都去云懷恪七子皆仕于朝少子希讓爲代宗都虞候渭北節度使封魯國公懷恪以子貴自右武衛將軍三贈至工部尙書兄懷亮右羽林軍大將軍魯公又爲臧氏書故宅碑紉宗碑縣志載之今皆亡矣

宋州八關齋會石幢 正書

在歸德府顏魯公譔并書廣德三年首篆文宋州八關齋會記 節度田神功寢疾愈宋州將徐向等爲之齋會作石幢以記之其事不足重以魯公書重之耳石幢八角每角闊八九寸高八尺

茅山碑 正書

在茅山顏真卿譔并書 魯公此碑字與顏家廟大麻姑壇相埒子得之友人敝篋中十損二三缺其首尾未獲考其年月

麻姑壇記 大歷六年

在撫州南城縣東南二十里麻姑山中 都元敬金薤琳  
琅云右唐小字麻姑壇記顏真卿撰并書今在江西南城  
縣之麻姑山歐陽公謂或者疑其非真而復以爲筆畫有  
法非魯公不能書也趙明誠謂陳無己嘗見黃魯直言此  
乃慶歷中一學佛者所書魯直能道其名及觀陸放翁云  
魯公麻姑壇記有大小二本蓋用羊叔子峴山故事通志  
金石畧載魯公書亦有小字麻姑壇記則歐陽公之疑與  
魯直之言又似不足信元柳待制道傳云麻姑壇碑小字

楷法尤精緊比聞舊石焚毀山中重刻宜也 顏魯公書

麻姑壇記有大小字兩石都元敬考論詳矣余昔過南城  
登麻姑山見小字石已漶漫而諸家所刻幾十數種雖非  
原本皆足見魯公書法風骨姑收此兩紙以存梗概若大  
字本則絕無而僅有戊寅春莫余于鶯脰湖潘次耕先生  
家見之字大如臧懷恪碑宛若新刻宋搨何疑真可寶也  
又余齋所藏帖字大莫如中興頌字小莫如麻姑壇皆魯  
公筆所謂神龍屈伸不可端倪者也侗記

摩崖中興頌

在祁陽縣浯溪石崖上元結撰顏真卿大字正書大歷六年摩崖石元宗泰山銘字體最大八分書若正書字大者則以此頌爲第一而結體最小者莫若麻姑壇皆魯公手筆元結序云非老于文學者其誰宜爲王元美謂首句噫嘻前朝孽臣姦驕非頌體此石本予得之舊家若今搨無此完好矣頌石後有黃庭堅讀中興頌詩宋刻漉漫畧可讀明華亭董元宰以白松綾五幅白書讀浯溪頌詩漫郎左氏癖魯公羲之鬼千載遠擅場同時恰對壘有唐九廟隨秋烟一片中興石不毀幾回吹律寒谷春幾度看碑

陳迹新遼鶴歸來認城郭杜鵑聲裏含君臣折釵黃絹生光怪舊國江山餘氣概當年富貴腸劍多異代風流椽筆在書生何負于國哉元祐之籍何當來子瞻飽吃惠州飯涪翁夜上浯溪臺扶藜掃石溪聲咽不禁技癢猶題碣清時有味是無能但漱湘流莫饒舌綾色如新墨光映射魯公千載後不得不推爲擅場予力不能得不知爲何人所  
有宋馬永卿曰中興頌云復復指期此兩字出漢書匡衡傳云所更或不可行而復復之注云下復扶日反又何武爲九卿時奏言宜置三公官又與翟方進共奏罷刺史



更置州牧後皆復復故注云依其舊也下復扶目反

右丞相廣平文貞公宋璟碑

在沙河縣西北八里墓前顏真卿撰并書大歷七年壬子  
碑側記大歷十三年戊午石高八尺廣四尺厚一尺一  
寸四面遍書前後面皆二十七行每行五十二字左右旁  
皆七行每行五十字歲久已斷仆于地明沙河令方豪起  
而立之別有碑記碑側記乃魯公續書宋世卽已缺裂崇  
寧間范致君別刻于石迄今五百餘載石多剝蝕而文隱  
隱可讀邢州司李蕭蟄菴震梓而傳之補史所未備恐碑

石湮沒不彰予裝錄側記于裝本之末 按文貞開元二

十五年丁丑冬卒壽七十五明年戊寅夏葬碑立于大歷

七年壬子自丁丑至壬子凡歷三十六年又六年戊午乃

大歷十三年復有碑側之記顏文忠興元元年甲子秋卒

于希烈之難壽七十六遯壬子書碑時文忠年六十四書

碑側時年七十矣文貞卒時文忠年始二十九開元五年

文貞同平章事文忠方九齡乃自少而壯壯而老世變屢

更而巍巍豐碑必出文忠斗筆此中謂非有神合乎千載

下見遺跡而想其德令人慨慕之無從也 蕭蟄菴至邢

訪文貞公後二十四代孫道亨攜族譜來公子七六無譜  
爲六子華譜甚詳華子儼蘇州刺史儼二子長嗣先左補  
闕次子嗣宗奉化令家焉明景泰初兵部侍郎諱剡者公  
十七代孫也過邢有望墓詩其家南和者十七代而絕宏  
治間南和令朱銳于奉化取公十九代孫伍來以守祠自  
伍至亨凡六世今家沙河者百餘人業農家南和者僅道  
亨一人奉化者久不相往來蟄菴震記

孔子廟殘碑

在華州程浩撰顏真卿正書 此文載于唐文粹爲扶風

縣文宣王廟記大歷二年駕部郎中程浩文而今西安府  
學有僧夢英書此一記其文正同但去扶風古縣也以下  
半篇其跋云此記刊石元在湖州臨安縣夢英愛而書之  
豈駕部先作此于扶風魯公又書之湖州而出其半篇耶  
再考唐地理志臨安屬杭州不屬湖州得非夢英之誤耶  
今華州有此殘碑數十字其文同

爭座位帖

在西安郡庠聖教序亭內右廂西行草書 此魯公爲檢  
校刑部尙書時與定襄郡王郭英又書稿論朝會不宜讓

內侍魚朝恩居上坐侃侃其詞俗謂爭坐位帖 宋沈括  
夢溪筆談曰都堂及寺觀百官會集坐次多出臨時唐以  
前故事皆不可考惟顏魯公與郭英父書云宰相御史大  
夫兩省五品供奉官自爲一行十二衛大將軍次之三師  
三公令僕少師保傅尙書左右丞侍郎自爲一行九卿三  
監對之從古以來未嘗參錯此亦畧見當時故事 趙子  
函曰不知何時上石石已泐矣而法猶可尋王元美云無  
一筆不作晉法所謂無意而文從容中道者也又云公剛  
勁義烈之氣文不能發而發之于筆墨間余嘗謂公學不  
如其人于麻姑壇見之詞不如筆楷不如行有意不如無  
意于此帖見之而都元敬乃謂草草之筆亦爲摹刻目中  
有筆余不能不服膺元美此碑雖泐而顏公筆法宛然近  
董氏摹入戲鴻堂帖乃云陝省者不足觀而自謂存公法  
度今以予觀董氏刻視此則神亡矣 此石質粗多麻孔  
畚字畫皆未損摹印不精遂致模糊予至郡庠墨洞與印  
工對坐竟日紙墨力俱佳僅得兩本觀者謂爲重刻又謂  
舊搨董氏誇有宋搨本想亦如是恨未一見

顏氏家廟碑

在西安郡庠李陽冰篆額顏氏家廟之碑建中元年建  
唐末喪亂其碑倒于郊野宋太平興國五年都院孔目官  
李延襲移建學宮立于明皇孝經石臺亭東北向碑首行  
題曰唐故通議大夫行薛王友桂國贈祕書少監國子祭  
酒太子少保顏君廟碑銘乃魯公父也次行第七子光祿  
大夫行吏部尙書充禮儀使上柱國魯郡開國公真卿譔  
并書 君諱惟貞字叔堅其敘先世或稱諱某若伯叔祖  
父羣從俱直書其名碑文已詳石四面遍書額上題字額  
陰片石方廣如前 魯公書云高祖記室君國初居此宅

號州君舍人君侍焉堂今置廟地高祖妣殷夫人居十字  
街西北壁第一宅祕書監君禮部侍郎君侍焉號州君居  
後堂華州君子堂中生焉今充神廚少保君堂今充齋堂  
廳屋充亞獻終獻齋室共八十五字人不知摹搨塵土封  
翳予拂拭摹出碑石高八尺廣四尺七寸厚一尺五寸前  
後皆二十二行每行四十七字左右旁皆六行每行五十  
字字比前後面畧小額字又差小

顏魯公與蔡明遠書

行草拓本二帖並依金石錄附于大歷之末

奉使蔡州題字

在同州中有魯公畫像 書曰真卿奉命來此事期未竟  
止緣忠勤無有旋意然中心悵悵始終不改游于波濤宜  
得斯報千百年間察真卿心者見此一事知我是行亦足  
達于時命耳又曰人心無路見世事只天知下有題曰觀  
此筆蹟不題歲月以事實考之蓋公使李希烈時也希烈  
以建中元年陷汝州盧杞建議遣公奉使至正元宋諱貞  
故作正  
元年八月丙戌公不蚤遇害因躓賊廷者踰二年刃加于  
頸而色不變度無還期誓不易節蓋書此以自表云靖康

元年七月壬申朝散郎祕閣修撰知同州軍事唐重書  
又有忠義堂帖宋人所刻此帖名爲奉命帖又有移蔡一  
帖曰貞元元年正月五日真卿自汝移蔡天也天之照明  
其可誣乎有唐之德則不朽耳十九日葉少蘊避暑錄話  
曰顏魯公真蹟宣和間存者猶有數十本其最著者與郭  
英父論坐位書在永興安師文家祭姪季明文病妻乞鹿  
脯帖在李觀察士衡家乞米帖天章閣待制王質家寒食  
帖在錢穆甫家其餘與蔡明遠帖盧八倉曹帖送劉太真  
序等當作劉  
太沖不知在誰氏皆有石本坐位帖安氏初析居

分爲二人多見其前段師文後乃併得之相繼皆入內府  
世間無復遺矣今忠義堂所刻已上諸帖皆有之又有送  
辛冕序清遠道士同沈恭之遊虎邱寺詩末題大歷五年  
十二月又有開元二年二月顏昭甫告身一通寶應元年  
七月顏惟貞贈祕書少監告身一通殷氏贈蘭陵夫人告  
身一通大歷十二年八月顏真卿刑部尙書告身一通建  
中元年八月真卿太子太師告身一通後有宋至和二年  
蔡襄跋嘉定乙亥劉元剛刻石

### 國子學石經

在西安府儒學明倫堂之後東西長廊樹立其下故稱墨  
洞開成二年立于國學宋元祐二年移立此舊唐書文宗  
紀開成二年宰臣判國子祭酒鄭覃以經義啟導稍接文  
學之士遂奏置五經博士依漢蔡邕刊碑列于太學創立  
石經九經諸儒校正訛謬上又令翰林勒字官唐元度復  
校字體石末有元度等表文一通

易經九卷九石二萬四千四百三十七字

書經十三卷十石二萬七千一百三十四字

詩經二十卷十六石四萬八百四十八字

周禮十一卷十七石四萬九千一百一十六字  
儀禮十七卷二十石五萬七千一百一十一字

禮記二十卷三十三石九萬八千九百九十四字

春秋左氏傳三十卷六十七石一十九萬八千九百四

十五字

公羊傳十二卷十七石四萬四千七百四十八字

穀梁傳十二卷十六石四萬二千八十九字

孝經一卷一石二千一百一十三字

論語十卷七石一萬六千五百九字

爾雅三卷五石一萬七百九十一字

五經文字四卷九經字樣一卷共十石

九經并孝經論語爾雅字樣等都計六十五萬二千五

十二字

大唐開成二年丁巳歲月次于元日維丁亥

書石學生前四門館明經臣艾居晦

書石學生前四門館明經臣陳玠

書石學生前文學館明經臣□□□□

書石官將仕郎守潤州句容縣尉臣段絳

校勘兼看書上石官將仕郎守四門助教臣陳莊士  
校勘兼看書上石官將仕郎守祕書省正字臣栢嵩  
覆定字體官翰林待詔朝議郎權知沔王友上柱國賜  
緋魚袋臣唐元度

校勘官兼專知都勘定經書檢校刊勒上石朝議郎守  
國子毛詩博士上柱國臣章師道

朝散大夫守國子司業騎都尉賜緋魚袋臣楊敬之  
都檢校官銀青光祿大夫□□□□□□□□□□□□

國子祭酒同中書門下平章事太清宮使監修國史上

柱國滎陽郡開國公食邑二千戶臣鄭覃

京兆府府學新移石經記畧汲郡龍圖呂公領漕陝右之  
日持適承乏雍學一日謁公公喟然謂持曰京兆闔閭間  
有唐國子監存焉其間石經乃開成中鐫刻唐史載文宗  
時大學勒石經而鄭覃與周墀等校定九經文字上石及  
覃以宰相兼祭酒于是進石壁九經一百六十卷卽今之  
石經是已舊在務本坊白天祐中韓建築新城而六經石  
本委棄于野至朱梁時劉鄩守長安有幕吏尹玉羽者白  
鄩請輦入城鄩方備岐軍之侵軼謂此非急務玉羽給之



曰一旦賊兵臨城碎爲矢石亦足助賊爲虐鄣然之乃遷  
置于此卽唐尙書省之西隅也地雜民居其處窪下霖潦  
衝注隨立輒仆埋沒腐朽歲久折缺殆非所以尊經而重  
道予欲徙置于府學之北牖予且俾圖來視厥卽視圖則  
命徒役具器用平其溝塹而基之築其浮虛而實之凡石  
刻之偃者仆者悉輦置于其地洗剔塵土補錮殘缺分爲  
東西次比而陳列焉明皇注孝經及建學碑則立之于中  
央顏褚歐陽徐柳之書下迨偏傍字源之類則分布于庭  
之左右俄而如登道山如入東序河圖洛書大璧琬剡爛

然在目而應接或不暇矣先是有興平僧誕妄惑衆取索  
無厭大尹劉公希道沒入其貲有欲請于朝以備慈恩浮  
圖者公卽建言崇飾塏廟非古而興建學校爲急朝廷乃  
以五百千畀之不費于公不役于民經始于元祐二年初  
秋盡孟冬而落成門序旁啟雙亭中峙廊廡回環不崇不  
庳誠故都之壯觀翰墨之淵藪也學者暇日於此游息得  
之於目而會之以心固已有超然遠詣之意豈曰小補之  
哉竊惟六經天人之道備聖人所以遺天下來世之意盡  
在於是自周末至隋千餘年之間已遭五厄汗簡所載或

焚或脫縑楮魚蠹易腐易裂道雖無窮而器則有敝惟鏡  
之金石庶可以久存有唐之君相知物之終始而憂百世  
之慮深故石經之立殆以此也然以洛陽蔡邕石經四十  
六碑觀之其始立也觀視摹寫車乘日千餘兩填塞街陌  
可謂盛矣及范蔚宗所見其存者纔十有六餘皆毀壞磨  
滅然後知不得其人以護持雖金石之固亦難必其可久  
此呂公所以爲有功于聖人之經而不可不書者也然持  
書此者豈特記其歲月而已哉將使後之君子知古人之  
用心而不廢庶斯文之有寄云爾元祐五年歲次庚午九

月黎持記河南安宜之書予以爲尹玉羽之功在呂公之  
上諸石殘缺多明崇禎閒費鑄別書九經補缺字樣別刻  
于石字不佳與唐不類予所裝裱石經手自補綴唐石有  
半字點畫可見者悉存之空缺處不得已用費字膽補

國朝陝撫賈漢復

曲沃人

於康熙三年補刻孟子于石孟子

七卷十石三萬六千五百六字昔周宣王石鼓韓昌黎請  
自鳳翔移至長安國學而不可得元人乃不遠數千里輦  
置燕都石經自唐開成歷宋至明迄今千餘年而孟子一  
書補之者乃出于漢復之手不能不作繞朝之歎然字與

刻手皆劣不足以媲美唐人 顧寧人金石文字記曰宰  
臣鄭覃以六經訛謬已多博士相沿難改正請召宿儒與  
學詳校正定準後漢故事勒石太學從之乃石經立又乖  
師法後數十年名儒皆不窺之以爲蕪累甚矣舊史之評  
如此愚初讀而疑之又見新書無貶詞以爲壁九經雖不  
逮古人亦何遠不賢于寺碑冢碣及得其本而詳校之乃  
知經中之繆戾非一而劉昫之言不誣也

五經文字三卷

凡一百六十部三千二百三十五字大歷十一年國子司  
業張參以說文字林兼采漢石經著爲定體按劉禹錫國  
學新修五經壁記曰大歷中名儒張參爲國子司業始詳  
定五經書于論堂東西廂之壁辨齊魯之音取其宜考古  
今之文取其正由是諸生之師心曲學偏聽臆說咸束而  
歸于大同積六十年崩剝汗蟻泯然不鮮今天子尙文章  
尊典籍國學上言遽賜千萬時祭酒皞博士公肅遂以羨  
贏再新壁書懲前土塗不克以壽乃折堅木負墉而比之  
其製如版牘而高廣其平如粉澤而絜滑背施陰闕使衆  
如一附離之際無跡可尋堂皇靚淡兩屋相照申命國子

能通法書者分章揆日懸其業而繕寫焉此文當作于天和年間自土塗而木版而石壁凡三易矣乃今石刻其末曰乾符三年孫毛詩博士自牧以家本重校勘定七月十八日書刻字人魚宗會其字別體與朱梁所刻相類而本文不然當是開成中所刻其中有磨改數字者意自牧所爲也

新加九經字樣一卷

凡七十六部四百二十一字右國子監奏覆定石經字體官翰林院待詔唐元度狀准大和漆年拾貳月伍日敕覆

定九經字體者今所詳覆多依司業張參五經文字爲准其舊字樣歲月將久畫點參差傳寫相承漸致乖誤今並依字書參詳改就正訖諸經之中別有疑闕舊字樣未載者古今體異隸變不同如總據說文卽古體驚俗若依近代文字或傳寫乖訛今與校勘官同商較是非取其適中纂錄爲新加九經字樣壹卷或經典相承與字義不同者具引文以注解今刊削有成請附于五經字樣之末用證紕誤者其字樣謹隨狀進上謹具如前

中書門下牋國子監牒奉 敕宜依牒至准 敕故牒

開成二年八月十二日跋

冊府元龜周太祖廣順三年六月尚書左丞兼判國子監事田敏獻印板書五經文字九經字樣各二部一百三十策奏曰臣等自長興三年較勘雕印九經書籍經注繁多年代殊邈傳寫紕繆漸失根源臣守官膠庠職司較定旁求援据上備雕鐫蚤遇聖朝克終盛事播文德于有截傳世教以無窮謹具陳進是此二書曾有印板而自宋以來學者不言之何也

吏部南曹尊勝咒石幢 天寶七載

在西安府學文廟櫺星門內 與六部題名石幢對立 左光允撰序

崇仁寺尊勝咒石幢 天寶七載

在西安府城西十里張少悌書今寺僧龕置經堂前知所愛護一字不損趙子函云深圓秀逸顧寧人謂以少悌之名存之

慈恩寺尊勝咒石幢

今在西安府城南寺內堂前

草堂寺尊勝咒石幢 在鄂縣楊萬歲書

經咒石幢秦中在處有之不下二十餘種太宗昭陵前

村內有石鼓寺石制如周宣王石鼓而稍大亦遍書尊勝  
經咒行筆甚佳石色甚美剝蝕過半予搜揚陵碑獨畧此  
今思亦覺可惜

嵩岳永泰寺尊勝咒石幢

在寺內庭西天寶九載立

成都府尊勝咒石幢

字特大與前五石異大和五年馬季武書嘉靖間土中掘  
出

來齋金石刻考畧卷中終

